

四庫全書

史部

欽定四庫全書

史部

御批資治通鑑綱目卷四十九上

詳校官修撰

臣錢榮

編修

臣程嘉謨覆勘

總校官降調編修

臣

倉聖脉

校對官中書

臣

宋枋遠

謄錄監生

臣

鄭辰

欽定四庫全書

御批資治通鑑綱目卷四十九上

起己亥唐憲宗元和十四年

凡十九年

己亥十四年春正月遣中使迎佛骨至京師貶韓愈為潮

州刺史

先是功德使上言鳳翔法門寺塔有佛指骨相傳三十年一開則歲豐公安來年應開請迎之上從其言至是佛骨至京師留禁中三日歷送諸寺王公士民瞻奉捨施惟恐弗及刑部侍郎韓愈上表諫曰佛者鬼狄之一法耳自黃帝以至禹湯文武皆享壽考百姓安樂當是時未有佛也漢明帝始有佛法其後

亂亡相繼運祚不長宋齊梁陳元魏已下事佛漸謹
年代尤促惟梁武帝在位四十八年前後三捨身為
寺家奴竟為侯景所逼餓死臺城事佛求福乃更得
禍由此觀之佛不足信亦可知矣佛本夷狄之人不
知君臣之義父子之恩假如其身尚在來朝京師陛
下容而接之不過宣政一見禮賓一設賜衣一襲衛
而出之於境不令惑衆也况其身死已久枯朽之骨
豈宜以入宮禁乞付有司投之水火永絕根本斷天
下之疑絕後代之惑佛如有靈能作禍福凡有殃咎
宜加臣身上得表大怒將加愈極刑裴度崔羣言愈
雖狂發於忠懇宜寬容以開言路乃貶潮州刺史自
戰國之世老莊與儒者爭衡更相是非至漢末蓋之
以佛然好者尚寡晉宋以來日益繁熾自帝王至士
民莫不尊信下者畏慕罪福高者論難空有獨愈惡
其蠹財惑衆力排之嘗**集覽**宣政一見馬文昌雜錄
作原道等篇行於世云

集覽

宣政一見馬文昌雜錄
曰今之文德殿唐之宣

政殿也是謂正衙而垂拱直其北紫宸乃在東偏禮
賓一設禮大宗伯以賓禮親邦國唐太宗因隋之禮
著為貞觀禮其賓禮四篇謂外國朝貢之禮也
賜衣一襲注見代宗大歷十四年賜襲衣質實中使

注見玄宗開元十五年鳳翔府名注見周顯王八年
岐京師注同上二十五年禁中注見宋考武大明六
年一統志云宣政殿名在西安府治東北五里唐大
明宮內殿次北有紫宸蓬萊含元麟德等殿殿前東
西廊有日華月華二門日華門東有弘文館潮州古
為閩越之地秦屬南海郡漢初屬南越武帝平南越
復屬南海郡晉咸和中屬東安郡義熙末又分立義
安郡梁兼置東陽州後改曰羸州陳罷州隋廢郡置
潮州治海陽縣大業中復為義安郡唐武德中改為
潮州天寶初改為潮陽郡乾元初復為潮州五代時
屬南漢宋開寶中平其地仍為潮州隸廣南東路元
至元中改置潮州路國朝初改路為府隸廣東道老

莊注見晉成帝咸康三年法
門寺注見文宗開成三年

書法

書至京師何遠也於是自鳳翔迎之終綱目
書迎佛骨二而凶穢之禍無不立見者憲宗

十四年正月書迎佛骨明年正月以國喪書懿宗
十四年正月書迎佛骨是年七月以國喪書事佛

求福反更得禍韓
愈之言不誣矣

發明

書以宦官為館驛使書賜六軍辟仗使印則
宦人為愈盛矣書以皇甫鏐程异同平章事

則宰相非其人矣書以柳泌刺台州則求仙之志
荒矣書遣中使迎佛骨則惑佛之念蠱矣憲宗號
為剛果而所為若此由其聖學不講素無理義以
養心故外物皆足以移之爾未幾金丹燥渴既不
足以享長年之歆而身且不保佛亦無如之何又
皆宦人相與為逆而宰相不能致詰凡此數事未

流若此躬自為之而躬自蹈之然則有天下國家者可不戒哉韓愈表諫幾致極刑要之排斥異端正議不屈至今凜凜猶有生氣綱目直書貶愈於迎佛骨之下蓋亦表其因是見貶故書而予之也

二月平盧都將劉悟執李師道斬之

田弘正李愬屢敗平盧兵李師道發民治城塹役及婦人民懼且怨都知兵馬使劉悟將兵萬餘人屯陽穀以拒官軍務為寬惠使士卒人人自便軍中號曰劉父或謂師道曰悟專收衆心恐有他志師道潛遣二使齎帖授行營副使張退令斬悟退素與悟善懷帖示之悟召諸將謂曰悟與公等不顧死亡以抗官軍誠無負於司空今司空信讒來取悟首悟死諸公其次矣且天子所欲誅者獨司空一人今軍勢日蹙吾曹何為隨之族滅欲與諸公還入鄆州奉行天子之命豈徒免危亡富貴可圖也有後應者皆立斬之

衆懼皆曰惟都頭命乃令士卒皆飽食執兵夜半聽鼓三聲絕即行人街救馬縛口遇行人執留之天未明軍至城下城中譟譟動地子城門已洞開牙中兵不滿數百皆投弓矢於地悟勒兵捕師道與二子斬之慰喻軍民斬賢師道逆謀者二十餘家文武將吏且懼且喜悟見李公度執手獻欵出賈直言於獄置之幕府田弘正遣使往賀悟函師道父子三首送弘正營弘正大喜露布以聞淄青等十二州皆平上命戶部侍郎揚於陵宣撫淄青分其地為三道以郭曹濮為一道淄青齊登萊為一道兗海沂密為一道自廣德以來垂六十年藩鎮跋扈河南北三十餘州自除官吏不供貢賦至是盡遵朝廷約束矣裴度纂述蔡鄴用兵以來帝之憂勤機畧因侍宴獻之請內印出付史官帝曰如此似出朕志非所欲也弗許范氏曰憲宗有功而不矜豈不賢哉而不能勝其驕侈之心卒任小人以隳盛業何邪蓋危則懼懼則善心生

安則泰泰則逸心生是以天下既平而禍患常生於所忽也胡氏曰纂述主德請付史官諄諛者所為也裴度亦爾何也曰度所謂循常人之事而寓忠智之意者也蔡鄆用兵度實任之功名之際人臣所難處也歸美於上推而弗居度之慮遠矣又載用兵以來上心憂勤則憲宗憶取之之難必思守之之不易是乃文類將順實有匡救君子之所為衆人固不識也

集覽

張暹姓名也暹思康反文類將順謂裴度

之文雖類於將順其美然其實則有匡君之意也胡氏曰孔子所謂將順者扶持誘掖之使臻于成也

質實

平盧軍名注見漢桓帝永康元年青州一統志云陽穀古地名春秋時屬魯僖公時齊宋江黃

會于陽穀即此隋置陽穀縣屬濟北郡唐屬濟州天寶後屬鄆州宋徙治上巡鎮金元俱仍舊國朝因之改屬兗州府司空謂李師道銜枚注見秦二世二年赦敕注見漢光武建武元年幕府注見秦王政三年

欽定四庫全書

御批資治通鑑綱目

卷四十九上

露布注見晉恭帝元熙二年鄆曹濮三州名鄆注見
肅宗實應元年曹注見漢光武建武八年濟陰濮注見
見周安王五年濮陽淄青齊登萊五州名淄注見宋
明帝泰始三年盤陽青注見漢桓帝永康元年齊注
見漢景帝三年濟南登注見玄宗開元二十年萊注
見漢安帝永初二年東萊充海沂密四州名充注見
漢獻帝興平二年海注見秦二世二年鄆沂注見陳
宣帝太建五年北徐密注見漢武帝征和二年諸邑
廣德代宗年號藩鎮注見肅宗上元二年跋扈注見
德宗貞元十五年蔡鄆二州名蔡注見漢光武建武
十九年汝南鄆注見前蓋
指吳元濟李師道言也

以劉悟為義成節度使

上欲移悟他鎮恐悟不受代復須用兵密詔田弘正
察之弘正曰遣使者脩好以觀其所為悟得鄆州三

日教手搏而庾觀之搖肩攘臂離坐以助其勢弘正聞之笑曰是何能為密表以聞上乃以悟為義成節度使悟聞制下手足失墜明日遂行而弘正已將數道兵至城西矣悟辟李公度李存郭耶賈直言以自隨素與李文會善亦召之及將移鎮時存謀曰文會佞人敗亂一道滅李司空之族不誅之何以雪三齊之憤乎乃詐為悟帖遣使斬之比還則悟已去矣師道將敗聞風動鳥飛皆疑有變禁鄆人親識宴聚及道路偶語弘正悉除其禁或諫曰鄆人久為寇敵不可不備弘正曰今為暴者既除宜施以寬惠若復為嚴察是以桀易桀也庸何愈焉先是賊數遣人入關截陵戰焚倉場流矢飛書以動京師有司督察甚嚴終不能絕及弘正閱李師道簿書有賞殺武元衡人王士元等及賞潼關蒲津吏卒案乃知曷者皆吏卒受賂容其姦也弘正送士元等十人詔有司鞠之皆款服悉誅之

集覽

截陵戰十一年盜斷建陵

門戟四枝
質實

義成節度注見懿宗咸通十年三齊張九韶曰東齊北齊膠東是謂之三齊偶

語注見代宗大歷十一年潼關注見漢獻帝建安十六年蒲津關名注見梁武帝大同元年

夏四月詔諸道支郡兵馬並令刺史領之

橫海節度使烏重胤奏曰河朔藩鎮所以能拒朝命者由諸州縣各置鎮將領事收刺史縣令之權也
曷使刺史各得行其職則雖有姦雄如安史必不能以一州獨反也臣所領德棣景三州已舉牒各還刺史職事應在州兵並令刺史領之故有是詔其後河北諸鎮惟橫海最為順命由重胤處之得宜故也范氏曰後世郡縣古之諸侯也委之以土地人民而不與之兵是以匹夫而守一州也天下有變則城郭不守而朝廷無藩籬之固何以異於無郡縣乎是故為法者必開盛衰使一縣之眾必由於令一郡之眾必

由於守守之權歸於按察按察之權歸於天子則天下如網網之相維臂指之相使矣唐自中葉郡置鎮兵主將有擅兵之勢而刺史無專城之任是以郡縣愈弱藩鎮愈強橫海一帥制之得宜而數世順命況天下處之皆得其

集覽

中葉謂中代之主鎮兵方鎮之兵也兵志曰府兵法壞而

方鎮盛矣所謂方鎮者節度使之兵也其始起於邊將之屯防者

質實

橫海節度永

和六年滄州河朔二州名注見玄宗天寶十五載安史謂安祿山史思明德棣景三州德注見陳宣帝太建八年安德棣注見宋明帝泰始三年樂陵景注見高祖武德九年藩籬注見太宗貞觀十三年藩屏

發明

自秦人郡縣天下後世因之舉四海之大其權悉制於天子太宗造唐蓋嘗欲謀封建而

卒不行然自中世以後遂有藩鎮之禍肅代德順
所食不支至元和號為中興亦且因仍不改故未

幾兩河復失夫懲沸羹者吹冷鑒方是之時幸而威令復振則當隨宜區畫漸復舊制使方鎮之權日以消弭而不自知凡天下幾郡其隸方鎮者有幾從其易者行之得一鎮則消一鎮之權或召入輔政或封以爵邑其未可行者姑少緩之則不出十年天下無復股髀之勢而指臂運矣夫何唐人念不及此徒能因事支拄苟偷目前故雖暫定一時而禍亂繼作其後卒以此亡豈不深可痛哉綱目書詔諸道支郡兵馬並令刺史領之其實止行於橫海一鎮而已有是文而無是實蓋惜之也

程异卒○裴度罷為河東節度使

度在相位知無不言皇甫鏐之黨擠之詔度以平章事鎮河東鏐專以掎克取媚人無敢言者獨諫議大夫武儒衡上疏言之鏐自訴於上上曰卿欲報怨邪鏐乃不敢言○史館修撰李翱上疏曰定禍亂者武

功也興太平者文德也今陛下既以武功定海內若
遽革幣事復舊制用忠正而不疑屏邪佞而不通改
稅法不督錢而納布帛絕進獻寬百姓租賦厚邊兵
以制戎狄數訪問待制官以通塞蔽此六者政之根
本太平所以興也陛下既已能行其難若何不為其
易乎以陛下天資上聖如不惑近習容悅之辭任骨
鯁正直之士與興大化可不勞而成也若其不然臣
恐大功之後逸欲易生進言者必曰天下既平陛下
可以高枕自逸則質實河東節度注見周赧王十二
年蒲坂武儒衡太原人元衡
從弟李翱趙郡人中十世孫陛下注見漢光
武建武二十七年骨鯁注見漢王邦三年

秋七月宣武節度使韓弘入朝

弘始入朝上待之甚厚弘獻馬三千絹五千雜繪三
萬金銀器千而汴之庫廩尚有錢百餘萬緡絹百餘

萬匹馬七千匹
糧三百萬斛

質實

宣武節度注見周顯王二十九年大梁汴州名注見上年大梁

羣臣請上尊號○沂州役卒王弁殺觀察使王遂

據龍德元年書成德將張文禮弑其節度使天祐五年
書淮西張顥徐溫弑其節度使則此當書弑其觀察使
遂本錢穀吏性狷急專以嚴酷為治盛夏當役士卒
營府舍督責峻急將卒憤怒役士王弁與其徒四人
斬之
執遂

書法

書役卒何微也微也何以名為刺史書也以
主帥而役卒之賤得以殺之則不綱甚矣

左右軍中尉各獻錢萬緡

自淮西用兵以來度支鹽鐵使及四方爭進奉
謂之助軍賊平又進賀禮助賞上加又進賀禮質實

淮西軍名注
見元和十年

書法

書病唐也德宗之病三一姑息藩鎮二
寵任宦官三聚斂貨財憲宗有二焉

發明

富有四海謂之天子則四海之內皆天子之
財也自後世置私藏於是姦臣有剥下奉上

以求媚者然藩方郡國或興利以求贏或漁民而
巧取其財猶有自來至於宦者供灑掃之役今雖
使之典領禁兵亦不過仰給公上而已安得復有
餘財以供進奉者哉左右軍中尉非能神運鬼輸
則其錢何從而得憲宗受其所獻獨不能少加思
慮推原其所自乎由其心蔽於好賄故雖曉然明
白之理亦不能察綱目於郡縣貢獻之中獨揭出
中尉書之所以譏其貪惑迷謬受欺而不自知為
後戒也其
旨微矣

欽定四庫全書

御批資治通鑑綱目
卷四十九上

八

以令狐楚同平章事

楚與皇甫鏐同年進士故鏐引以為相

質實

進士注見玄宗開元十七年

八月以韓弘為司徒兼中書令張弘靖為宣武節度使

弘靖宰相子少有令聞立朝簡默及帥河東承王鏐聚斂之餘帥宣武繼韓弘嚴猛之後康謹寬大上下

安質實

河東郡名注見漢獻帝建安七年

魏博節度使田弘正入朝質實

魏博節度注見漢成帝綏和二年魏郡

上待之甚厚

庫部員外郎李渤病免

勅使陳許還言臣過渭南諸縣人多流亡舊三千戶者今纔千戶迹其所以然皆由以逃戶稅攤於比隣致驅迫俱逃聚斂之臣剥下媚上惟思竭澤不慮無魚乞降詔書禁絕計不數年人皆復於農矣執政見而惡之勅遂質實陳許二州名注見德宗貞元二年謝病歸東都質實陳許二州名注見德宗貞元二年年東都注見秦莊渭南縣名注見漢獻帝建安十六襄王元年三川

以王弁為開州刺史誘誅之

朝廷議興兵討王弁恐青鄆相扇繼變乃除弁開州刺史既行所在減其導從加以桎械乘驢入關腰斬東市先是三分鄆兵以隸三鎮及遂死朝廷以為師道餘黨凶態未除以棧州刺史曹華為沂海觀察使引棧兵赴鎮討之將士迎候者華皆以好言撫之衆皆不疑華視事三日大饗將士伏甲士千人於幕下

諭之曰天子以卿人有遷徙之勞特加優給宜令卿人處右沂人處左既定沂人皆出因闔門謂曰王常待以天子之命為帥於此將士何得輒害之語未畢伏者出圍而殺之死者千二百人司馬公曰春秋書楚子虔誘蔡侯般殺之于申彼列國也孔子猶深貶之惡其誘討也況為天子而誘匹夫乎王弁庸夫乘累竊發苟帥得人戮之易於犬豕耳何必以天子詔書為誘人之餌乎且作亂者五人耳乃使曹華設詐屠千餘人不亦濫乎然則自今士卒孰不猜其將帥將帥何以令其士卒上下盼盼得間則更相魚肉禍亂何時而弭哉惜夫憲宗之業所以集覽王常侍質不終由苟狗近功不敦大信故也

實

開州注見順宗永貞元年東市注見晉元帝太興元年曹華宋州楚丘人

書法

憲宗之篇嘗書訪執盧從史矣於是復見譏也長沙王誘誅英布則予其功此其為譏何

一役卒耳上以重爵誘而誅之不刑甚矣終
綱目書誘殺九誘誅二詳漢高帝十二年

以田弘正兼侍中遣還鎮

弘正三表請留不許乃加兼侍中遣還鎮弘正恐一
旦物故魏人猶以故事繼襲故兄弟子姪皆仕諸朝
上皆擢居顯列朱
紫盈庭時人榮之質實物故注見漢武
帝元光五年

十月安南遣將楊清討黃洞蠻清作亂殺都護李象古

考異

十月上漏冬字提要
有冬字討當作擊

象古以貪縱苛刻失衆心清世為蠻酋象古召為牙
將命將兵討黃洞蠻清因人心怨怒夜還襲州陷之
初蠻賊黃少卿自貞元以來數反覆桂管觀察使裴
行立容管經畧使陽旻欲徵倖立功爭請討之上從

之嶺南節度使孔戣屢諫曰此禽獸耳不足與論是非不聽大發江湖兵會二管入討士卒多瘴死安南乘之遂殺都護二管亦

集覽

蠻酋酋帥之稱桂管

彫弊惟殘所部晏然

秦桂林郡唐置桂管

猶府也今廣西靜江府是容管

質實

桂州名注見秦

漢合浦郡唐置容管今廣西是

桂林容州名注見代宗大歷六年徵倖注見宋孝武

大明二年嶺南節度注見秦始皇三十三年南海安

南府名注見宣

吐蕃圍鹽州考異

關當作冠

吐蕃十五萬衆圍鹽州刺史李文悅竭力拒守凡二十七口吐蕃不能克靈武牙將史奉敬言於朔方節度使杜叔良請兵解圍叔良以二千五百人與之奉敬行旬餘無聲問朔方人以為俱沒矣無何奉敬自

金石性烈烹煉
益毒從古餌之
被害者衆矣後
人猶蹈覆轍傷
者不可勝數何
也夫金石固不
可餌即養生家
運氣黃河逆流
之說亦屬矯揉
朕嘗體中小不

貶裴潏為江陵令

地道出吐蕃背吐蕃大驚
質實鹽州注見德宗貞元三年靈武郡名注見

太宗貞觀二十年靈州朔方節度注見漢武帝
元朔元年吐蕃西羌種名注見太宗貞觀八年

柳泌至台州驅吏民采藥歲餘無所得而懼逃入山
中浙東觀察使捕送京師皇甫鎔李道古保護之上
復使待詔翰林服其藥日加燥渴起居舍人裴潏上
言曰除天下之害者受天下之利同天下之樂者饗
天下之福自黃帝至於文武享國壽考皆用此道也
自去歲以來所在多薦方士借令真有神仙彼必深
潛巖壑惟畏人知凡候伺權貴之門以大言自銜奇
伎驚衆者皆不軌徇利之人豈可信其說而餌其藥
邪夫藥以愈疾非朝夕常餌之物況金石酷熱有毒
又益以火氣殆非五藏所能勝也古者君飲藥臣先

平尋味諸道書
殊無所得靜覽
性理全編遂覺
神志清明舉體
有主足見方士
家言皆不可信

嘗之乞令獻藥者先餌一年

質實

台州注見晉孝武
太元二年臨海浙

則真偽可辨矣上怒貶潯
東觀察使注見漢和帝永元元年會稽方士注見元
和六年京師注見周顯王二十五年不軌注見漢靈

帝光和五年江陵縣名注
見漢獻帝建安十三年

崔羣罷為湖南觀察使

初帝問宰相玄宗之政先理而後亂何也崔羣對曰
玄宗用姚崇宋璟盧懷慎蘇頲韓休張九齡則理用
宇文融李林甫楊國忠則亂故用人得失所繫非輕
人皆以天寶十四年安祿山反為亂之始臣獨以為
開元二十四年罷張九齡相專任李林甫此理亂之
所分也願陛下以開元初為法以天寶末為戒乃社
稷無疆之福皇甫鎛深恨之范氏曰崔羣之言豈徒
有激而云哉其可謂至言矣聖人復起不能易也○

及羣臣議上尊號皇甫鏐欲增孝德字羣曰言聖則孝在其中矣鏐言於上曰羣於陛下惜孝德二字上怒時鏐給邊軍不時又多陳敗之物軍士怨怒流言欲為亂李光顏憂懼欲自殺遣人訴之上不信京師怕懼羣具以聞鏐密言於上曰邊賜皆如舊制而人情忽如此者由羣鼓扇將以賣直歸怨於上也上以為然罷羣於是鏐質實湖南觀察使注見宋文帝元嘉十六年衡陽社稷注見新莽天中外切齒於鏐

鳳元年李光顏京兆人流
言注見漢元帝初元五年

以狄兼謩為左拾遺

中書舍人武儒衡有氣節好直言上器之顧待甚渥人皆言其且入相令狐楚忌之思有以沮之乃薦兼謩才行擢左拾遺兼謩仁傑之族曾孫也楚自草制辭盛言天后竊位姦臣擅權賴仁傑保佑克復明辟

儒衡泣訴於上曰臣曾祖平一在天集覽平一武儒
后朝辭榮終老上由是薄楚之為人衡曾祖名

質實

伏兼暮太原人明辟注
見漢孺子嬰初元元年

庚子十五年春正月上暴崩於中和殿閏月太子即位考

異

上當作帝。按分注時人皆言內常侍陳弘志弒逆
太和九年書陳弘志伏誅分註討元和之亂又據唐

書舊紀云內官陳弘志弒逆史氏諱而不書王守澄傳
云陳弘志等弒逆內官祕之但云藥發暴崩則此當書

內常侍陳弘志弒帝于中和殿以為寵任宦官者之戒
竊考晉張貴人因孝武醉寢弒之重賂左右曰因魘暴

崩時太子闇弱遂不推問綱目書貴人張氏弒帝且漢
平隋文史皆書崩綱目書恭廣弒逆然則憲宗書崩乃

錄史舊文而非定本也尹氏發明謂特書暴崩以著大
臣不能究詰之罪疑非朱子之意且與前後書法皆不

相

考證

當作太子
恒即位

初左軍中尉吐突承瓘謀立愷王惲為太子上不許
太子憂之密問計於其舅司農卿郭釗釗曰殿下但
盡孝謹以俟之勿恤其他上服金丹多躁怒左右宦
官往往獲罪有死者人人自危至是暴崩於中和殿
時人皆言內常侍陳弘志弑逆其黨類諱之不敢討
賊但云藥發外人莫能明也中尉梁守謙與宦官王
守澄等共立穆宗殺承瓘及惲賜左右神策軍士錢
人五十緡范氏曰憲宗伐叛討逆威令復張而變生
近習身陷大禍由仕相非其人故也可不為深戒哉
可不為深戒哉然陳弘志弑憲宗而穆宗不討賊故
舊史傳疑而已其後文宗謀誅宦官蓋以討亂而宣
宗追治逆黨戮之殆盡其子孫皆以為弑則何疑哉

質實

愷王惲
上元二年惲憲宗之子

書法

試也曷為不書試罪唐之君臣也弘志弒逆舉朝恬然不能究覈以正其誅而即位如常

時綱目止曰暴崩所以深罪之也然則其與非弒何別焉崩而書地異其文所以異其事也是故書

暴崩以著君臣之失書伏誅以正弘志之罪太宗太和九年合而觀之當時之獄具矣○賀善贊曰

憲宗志平僭叛所向有功真中興之主矣獨以失於承宗則以任承瓘也蓋帝有二病一任宦閣二

好進奉綱目終憲之篇非是無譏辭者末年信惑異端身陷大禍豈不重可惜哉○唐世宦官弒君

立君
始此

發明

憲宗之終唐史書陳弘志等反與中宗馬秦客敬宗劉克明之事無異而王守澄傳又載

其與陳弘志弒憲宗則是弒逆明矣至范祖禹亦正名其弒今分注詳載于下者是也惟通鑑書為

暴崩然且謂時人皆言陳弘志弑逆其黨類諱之不敢討賊則其事無可疑者胡為綱目亦不敢正名其事耶夫使憲宗有疾則太子諸王與用事大臣皆當入侍萬一果以藥發則大臣亦當相率同列入視大行之狀為何若推問左右藥發之由則是真偽瞭然在目而逆賊得矣既不能然乃悉聽羣閹所為果何謂耶且天子乃天下之天子非北司之天子也以天子罹禍尚莫能明則天下事變更有大於此者乎春秋之法君弑賊不討則深責其國為無臣子穆宗位居冢嫡是時春秋已二十有六宰臣乃皇甫鏞令狐楚輩綱目特書暴崩者一以著大臣不能究詰之罪一以著嗣君不能討賊之罪所以深誅唐之臣子為失職耳夫以弑逆在他入而誅責在臣子則天下其有不討賊者乎逆賊其有容足之地者乎故曰綱目修而亂臣賊子懼

貶皇甫鏐為崖州司戶以蕭儉段文昌同平章事

輟西官朝臨集羣臣於月華門外宣制貶鏐市井皆相賀上議命相令狐楚薦儉儉亦鏐同年進士上欲

誅鏐儉及宦官救之得免質實崖州注見漢武帝元鼎六年珠崖

市井注見宋孝武孝建元年

柳泌伏誅貶李道古為循州司馬質實

循州注見晉高帝天福七年司

馬官名注見宋文帝元嘉二十八年

書法

泌方士也綱目抑左道於方士必以伏誅書繫道古於泌之下所以示臣子之道而戒詭

遇也終綱目方士書誅七新垣平少翁樂大潘誕柳泌趙歸真李玄伯

○以薛放為工部侍郎丁公著為給事中

上未聽政召太子侍讀薛放丁公著入質實薛放河
侍禁中參預機密欲以為相二人固辭

人戎之弟丁公
著蘇州吳縣人

尊貴妃郭氏為皇太后

后郭曖之女也為廣陵王妃憲宗即位羣臣累表請
立為后憲宗以妃宗門強盛恐正位之後後宮莫得
進託以歲時禁忌不許至是乃尊為皇太后胡氏曰
天子治外后治內各正其位天地之大義也以事之
重也故必擇勲賢之後令叔之質以繼先聖為天地
宗廟社稷之主未聞有宗門強盛之虞後宮不得進
之患而終身不立后者也憲宗身位冢嗣娶汾陽愛
孫正執加焉而反不能居之以正以欲廢度以縱廢

禮卒致郭妃晚罹武殺之禍其所由來豈無漸乎

集覽

郭曖姓名也曖音愛韻會曖曖日不明貌

質實

郭曖華州鄭縣人子儀第六子汾陽謂郭子儀

書法

有書立貴妃某氏為皇后矣未有為皇太后者也有書立上母某妃為皇太后矣未有尊

貴妃者也此帝母也書不以尊帝母書書貴妃所以志憲宗不正坤闈之失也貴妃為皇太后終綱目一書而已矣

上與羣臣皆釋服考異

上亦當作帝

書法

特筆也自漢文遺詔短喪滿者皆是不書書此何譏穆宗之君臣也君弑賊不討而

視如常時踰月皆釋服又且因肆赦而盛陳倡戲為人倫戒矣故特書上與羣臣釋服兩責之也自

此二月書赦天下八月書浚魚藻池九月書大宴十月書幸華清重譏之也

發明

三年之喪自天子達漢文變古以日易月然後世之君亦有於宮中自終其禮者今憲

宗之禍穆宗既不能為之討賊而又遽爾釋服其薄於大倫甚矣故綱目特筆於是月書之所以深罪當時君臣而貶之也不然他時釋服未有書而此獨書何哉

○二月赦天下

上御樓肆赦事畢盛陳倡優雜戲而觀之又幸左神策軍觀手搏監察御史楊虞卿上疏曰陛下宜延問羣臣惠以氣色使進忠若趙利論政若訴冤如此而不致昇平者未之有也衡山人趙知微亦上疏諫上遊畋無節上雖不能用亦不罪也胡氏曰憲宗不知帝王之學李絳白居易崔羣等亦隨事納忠而已未

有能極論大學本末使帝服膺拳拳而勿失者也既不知學遂不能擇人以教其子穆宗非有下愚不移之資若憲宗知周公傳成王之道自其幼學而輔導之居仁由義通古知今則豈不為賢主乎不能如是是以一日踐祚失道至此皆憲宗之過也是故善為國家遠慮者必以輔導太子為急而其言曰人主就學非止涉書史覽古今而已而所謂輔導者又非必告詔以言過而後諫也在乎薰陶涵養而已矣此誠國家至急至切之務雖

質實

倡優注見隋文帝開皇二十年楊虞卿弘農人

聖人復起不能易也

寧之子御史官名注見漢成帝河平二年衡山縣名注見太宗貞觀十七年

以柳公權為翰林侍書學士

上見公權書跡愛之問之曰卿書何能如是之善對曰用筆在心心正則筆正上然改容知其以筆諫

也
質實

柳公權華原人公綽之弟

書法

侍書學士未有書者書公權何嘉筆諫也

夏五月以元稹為祠部郎中知制誥

江陵士曹元稹與監軍崔潭峻善上在東宮聞宮人誦稹詩而善之及即位潭峻歸朝薦之上以為知制誥朝論鄙之會同僚食瓜於閣下有青蠅集其上武儒衡以扇揮之曰適從何來遽集於此同僚皆失色儒衡意質實東宮注見宋文帝元嘉二十七年

書法

知制誥不書嘗書蘇源明矣於是復見其復見何病之也曷為病之前書貶元稹為江陵

士曹宦官也此書以元稹為祠部郎中知制誥亦宦官也前以忤宦官貶今以善宦官用一元稹也

前後相反如二人焉此
綱目所以深病之也

六月葬景陵質實

一統志云景陵在西安府蒲城縣南三十里金嶺山

○以崔羣

為吏部侍郎

上召羣對別殿謂曰朕升儲副知卿為羽翼對曰先帝之意久屬聖明臣何力之有

太后居興慶宮質實

興慶宮注見玄宗開元二年

太后居南內海朔望上帥百官詣宮門上壽上性侈所以奉太后者尤華靡胡氏曰君子不以天下儉其親然至於侈靡越度則非所以為孝矣

書法

居者何順辭也徒辭有二書徒某太后者逆辭也書某太后從居某宮者順辭也終綱目

書太后徙居二崇德褚氏積慶蕭氏書太后歸某宮一漢上官氏書太后居某宮一郭氏書太后遷

居某宮一漢隱太后皆順辭也

秋七月以鄆曹濮節度為天平軍質實

天平軍注見漢獻帝興平元年東平

○令狐楚罷

楚為山陵使不給工人偏直收其錢十萬為羨餘以獻怨訴盈路故罷之

八月浚魚藻池質實

一統志云魚藻池在西安府唐禁苑中穆宗嘗發神策軍浚此池

以崔植同平章事○九月大宴

上南過公除即事遊畋聲色賜與無節欲以重陽大宴拾遺李珣即其同僚上疏曰元朔未改山陵尚新

雖陛下就易月之期俯從人欲而禮經著三年之制猶服心喪合譌內庭事將未可上不聽羣臣入閣退諫議大夫鄭覃崔暉等五人進言陛下宴樂多過遊畋無度今胡寇壓境忽有急奏不知乘輿所在又晨夕與近習倡優狎暱賜與過厚夫金帛皆百姓膏血非有功不可與雖內藏有餘願陛下愛之萬一四方有事不復使有司重斂百姓時久無問中論事者上始甚訝之謂宰相曰此輩何人對曰諫官上乃使人慰勞之曰常依卿言宰相皆賀然實不能用也上嘗謂給事中丁公著曰聞外間人多宴樂此乃時和人安足用為慰公著對曰此非佳事恐漸勞聖慮上曰何故對曰自天寶以來公卿大夫競為遊宴沈酣晝夜獲雜子女不愧左右如此不已則百職皆廢陛下能無獨憂勞乎願少加禁止乃天下之福也

集

覽

公除注見隋煬帝大業元年李珣姓名也珣與殷同音角易月之期漢文帝遺詔令百官短喪以日

易月優雜子女記樂記篇及優侏儒獲雜子女不知
父子注優倡也侏儒短小人也獲獼猴也音乃刀反
與猱同如猱之雜戲也質實重陽節名魏文帝書歲
淫亂男女之尊卑也往月來忽逢九月九日

蓋九為陽數其日與月並應故曰重陽鄭覃鄭州人
珣瑜之子崔郾貝州武城人郾之弟陛下注見漢光
武建武二十七年乘輿注見漢安帝
延光四年萬一注見高祖武德九年

書法

綱目書宴於是十有六矣詳漢高帝五年未
有書大者此其書大何譏唐人也君弑賊不

討未十月而大宴綱目所深罪也故操卒未半年
而曹丕饗士則書大憲弑未十月而穆宗設宴則
書大皆罪其無父也
舍是無書大宴者矣

冬十月成德節度使王承宗卒詔以田弘正代之王承

元為義成節度使

王承宗卒其下秘不發喪立承宗之弟承元承元時年二十曰諸公未忘先德不以承元年少使攝軍務承元請盡節天子以遵忠烈王之志諸公肯從之乎眾許諾承元乃視事於都將聽事不稱留後表請除帥諸將及鄰道爭以故事勸之皆不聽詔以田弘正為成德帥承元移鎮滑州將士諠譁不受命承元以詔旨諭之諸將號哭不從承元出家財以散之謂曰諸公之意甚厚然使承元違天子之詔其罪大矣昔李師道之未敗也朝廷嘗赦其罪師道欲行諸將固留之其後殺師道者亦諸將也諸將勿使承元為師道則幸矣大將李寂等固留

集覽

聽事注見晉愍帝建興二年不受命

先是河朔諸鎮不受更代擅以其子弟傳襲選命於朝遂為故事

質實

成德節度注見漢光武建

武九年常山忠烈王王莽宗卒謚忠烈王滑州注見隋恭帝皇泰二年

書法

承宗請帥也田興請吏書請吏此則曷為不書不必書也田興請吏詔就命之不書請吏

則與代德之姑息何異書之所以著田興恭順之節憲宗應接之宜也今以承元為義成而承元奉詔則承元之節著矣不書可也

吐蕃寇涇州

涇州奏吐蕃入寇距州三十里告急救以梁守謙為神策行營都監并發八鎮全軍救之邠寧兵以神策受賞厚皆愠曰人給五十緡而不識戰鬪者彼何人邪常額衣資不得而前冒白刃者此何人邪洵洵不止節度使李光顏親為開陳大義然後所實實涇州軍士感悅而行將至涇州吐蕃懼而退注見

漢光武建武元年安定郡寧道名注見漢桓帝
延熹五年幽州惲惲注見中宗嗣聖二十年

幸華清宮考異

幸上漏
帝宇

考證

幸當
作如

上將幸華清宮宰相帥兩省官詣延英門三上表切
諫皆不聽諫官伏門下至暮乃退明日上自複道出
城幸華清宮獨公主駙馬中
尉兵千人扈從晡時還宮
集覽華清宮唐之湯沐
之宮也玄宗天寶

六載始建勅賜名華清治湯井為池環山列宮複道
注見秦始皇二十六年公主注見晉安帝隆安五年

駙馬國之壻也漢武帝初置駙馬都尉掌駙馬至晉
尚公主者並加之中尉按漢百官表中尉掌徵循京

師質實

華清宮注見玄宗天寶七載兩省注見中宗
景龍二年延英門注見德宗貞元三年延英

殿扈從注見昭宗乾
寧四年石門扈從

書法

玄宗之末三書幸華清宮矣自後未有書者於是復書穆宗可謂忘其親矣後此太后書

幸華清敬宗書幸溫湯帝啓之也

發明

既書釋服又書肆赦又書浚池又書大宴至是又書幸華清宮極矣穆宗縱情忘禮天理

既滅雖欲久於其位尚可得乎

容管遣兵討蠻賊黃少卿破之

時黃少卿久未平國子祭酒韓愈上言黃家賊居無城郭依山傍險尋常亦各營生急則屯聚相保比緣邕管經畧使多不得人德既不能綏懷威又不能臨制侵欺虜縛以致怨恨遂攻劫州縣侵暴平人或聚或散終亦不能為事近者裴行立陽旻意在邀功獻計征討邕容兩管經此凋弊殺傷疾疫十室九空如

此不已臣恐嶺南未得寧息兼此賊徒亦甚傷損察
其情理厭苦必深若因改元大慶赦其罪戾遣使宣
諭必望風降伏仍為選擇有威信者為質實一統志
經畧使處置得宜自無侵叛上不能用質實云邕管
邕州名周為百粵之地秦并南粵為桂林郡地漢為
鬱林郡之領方縣地晉分置晉興郡隋平陳廢郡為
縣屬簡州後改曰宣化縣屬鬱林郡唐初於縣置南
晉州貞觀中改為邕州屬嶺南道天寶初改為朗寧
郡乾元初復為邕州後置建武軍節度宋初仍為邕
州隸廣南西路大觀初改軍名永寧元至元中改置
邕州路泰定初改為南寧路
國朝初改路為府隸廣西道

辛丑 穆宗皇帝長慶元年春正月詔河北諸道各均定兩

稅○蕭俛罷

倪介潔疾惡為相重惜官職少所引拔西川節度使
王播大脩貢奉且以賂結宦官求為相段文昌復左
右之詔徵播詣京師倪屢爭之言播織質實西川節
邪不可以汙台司上不聽倪遂辭位質實度注見
晉武帝泰始八年益州王播太原
人台司注見隋恭帝皇泰元年

段文昌罷以杜元穎同平章事質實

杜元穎京兆杜陵人如晦五世孫

○以王播為鹽鐵使考異

提要使字上有轉運二字

播奏約榷茶額每百錢加稅五十李珣等諫曰榷茶
近起貞元多事之際今天下無虞所宜寬橫歛之目
而更增之百姓何質實榷茶榷注見漢
時當得息肩不從質實武帝天漢三年

回鶻保義可汗死考異

提要死字誤作卒

質實

回鶻北狄種名注見太宗貞觀

元年回紇可汗夷狄君長
號注見漢後主景耀四年

○盧龍節度使劉總棄官為

僧以張弘靖代之

總既殺其父兄心常自疑數見父兄為崇常於府舍
飯僧便為佛事晚年恐懼尤甚亦見河南北皆從化
奏乞棄官為僧詔從之子弟將佐皆加超擢百姓給
復一年軍士賜錢一百萬緡總以印節授留後張玘
夜遁去卒于定州初總奏分所屬為三道以幽涿營
為一道平薊媯檀為一道請除張弘靖薛平為節度
使瀛莫為一道請除盧士玫為觀察使弘靖先在河
東以寬簡得衆總以燕人傑驚日久故舉弘靖以安
輯之平嵩之子知河朔風俗而盡誠於國士玫則總
妻族之親也總又盡擇麾下宿將有功難制者朱克
融等送京師乞加獎拔使燕人有慕羨朝廷祿位之
志又獻征馬萬五千匹然後委去克融滔之孫也是

時上方酣宴不以天下為意崔植杜元穎無遠畧不知安危大體苟欲崇重弘靖惟割羸莫二州以士攻領之餘皆統於弘靖朱克融輩久羈旅京師至假旬衣食日詣中書求官植元穎不之省尋勒歸本軍驅使克融輩皆憤怨先是河北節度使皆與士卒均勞逸弘靖雍容驕貴莊默自尊涉旬乃一出坐決事賓客將吏罕得聞其言情意不按政事多委之幕僚韋雍輩又皆年少輕薄嗜酒豪縱裁刻軍士糧賜數以反虜詬之謂軍士曰今天下太平汝曹能挽兩石弓不若識一丁字由是軍中人人怨怒質實盧節度注見漢武帝元朔二年肥如定州注見周威烈王二十三年中山幽涿營三州名幽注見高祖武德四年涿注見漢帝玄更始二年營注見晉武帝太康二年昌黎平薊媯擅四州名平注見秦王政三年北平薊注同上年漁陽媯注見晉懷帝永嘉五年廣寧檀注見中宗嗣聖十五年瀛莫二州瀛注見漢帝玄

更始二年河間莫注見周世宗顯德六年燕人燕州之人注見高祖武德九年河朔二州名注見玄宗天

寶十五載麾下注見漢獻帝建安十四年朱克融幽州人河北節度注見漢成帝綏和二年魏郡

書法

於是劉總請吏則何以不書總弒父與兄賊也故削之然則棄官為僧何以書譏失賊也

與書棄官隱嵩山者霄壤矣終綱目書棄官二宗嗣聖十二年武攸緒是年劉總

發明

劉總弒父殺兄自不能容卒之遁死定州蓋亦人不能討而天誅之耳綱目書其棄官為

僧正所以譏唐人之失賊也

夏四月貶錢徽李宗閔為遠州刺史楊汝士為開江令

翰林學士李德裕吉甫之子也以中書舍人李宗閔嘗對策譏切其父恨之宗閔又與翰林學士元稹爭

進取有陳右補闕楊汝士與禮部侍郎錢徽掌貢舉
西川節度使段文昌翰林學士李紳各以書屬所善
進士乃榜出二人所屬皆不預而鄭覃弟朗裴度子
謨宗閔壻蘇巢汝士弟殷士及弟文昌言於上曰今
歲禮部殊不公所取皆以關節得之上以問諸學士
德裕植紳皆以為然上乃命覆試黜朗等十人而貶
徽等或勸徽奏二人屬書上必悟徽曰苟無愧心得
喪一致奈何奏人私書豈士君子所為邪取而焚之
時人多之自是德裕宗閔各分朋黨更相傾軋垂四
十年范氏曰昔漢之黨錮始於甘陵一部相讎而成
於太學諸生相譽海內塗炭二十餘年唐之朋黨始
於牛僧孺李宗閔對策而成於錢徽之貶皆自小以
至大因私以害公皆由主聽不明君子小人雜進於
朝不分邪正忠讒以黜陟之而聽其自相傾軋以養
成之也漢之黨尚風節故政亂於上而俗清於下及
其亡也人猶畏義而有不為唐之黨趨勢利勢窮利

欽定四庫全書

御批資治通鑑綱目

卷四十九上

盡而止故其衰李士無操行不足稱也為國家者可不防其漸哉胡氏曰李衛公才高氣動而不知道惜哉宗閔對策亦據己見論國事耳使言而非無足校者使言而是則亦力善效忠以蓋前愆而已不當怨而不解也僧孺之黨雖多小人使文饒忿而思難兼收而並容之彼必皆為吾用矣**集覽**相傾而思難兼收而並容之彼必皆為吾用矣相傾陷也軋乙黠反以勢相傾也李衛公**質實**開江縣名李德裕封衛國公文饒德裕表字**質實**開江縣名永貞元年開州李德裕贊皇人李紳亳州譙人敬玄曾孫關節行賄請求權要也黠陟注見德宗貞元年年

書法

牛李之黨釁成矣故謹書之

五月遣使冊回鶻崇德可汗以太和長公主妻之

公主上之妹也吐蕃聞唐與回鶻婚寇青塞堡回鶻
奏以萬騎出北庭萬騎出安西拒吐蕃以迎公主

質實

太和縣名注見梁武帝天監四年青塞堡未詳
處所北庭府名注見齊明帝建武四年高昌安

西鎮名注見高

宗永淳元年

秋七月盧龍軍亂囚節度使張弘靖推朱克融為留後

韋雍出逢小將策馬衝其前導雍命杖之河朔軍士
不貫受杖不服雍白弘靖繫治之是夕士卒連營呼
譟作亂囚弘靖殺雍等迎朱克融為留後衆以判官
張徹長者不殺徹罵曰汝何敢反行且族滅衆共殺

之集覽

不貫貫
讀曰慣

發明

幽燕自安史以來世為悖逆重以劉總之惡
唐不能討至是又復首亂河朔浸淫至于劉

守光極矣蓋其腥羶虐焰安於為逆目為夷狄禽獸之歸網目詳書于冊亦所以志他日淪陷虜庭之由也

貶張弘靖為吉州刺史質實

吉州注見晉安帝元興元年安成

○成德

兵馬使王庭湊殺節度使田弘正起復田布為魏博節度使討之

初田弘正徙鎮成德自以久與鎮人戰有父兄之仇乃以魏兵二千自衛請度支供其糧賜戶部侍郎崔俊剛徧無遠慮恐開事例不肯給弘正不得已遣魏兵歸弘正厚於骨肉子弟在兩都者數十人競為侈靡日費約二十萬弘正輦魏鎮之貨以供之相屬於道將士頗不平都知兵馬使王庭湊果悍陰狡潛謀

作亂以魏兵故不敢發及魏兵去夜結牙兵殺弘正
自稱留後逼監軍奏求節鉞朝廷震駭使於崔植為
再從兄故人不敢言其罪魏博節度使李愬聞變素
服流涕令將士曰魏人所以得通聖化安寧富樂者
田公之力也今鎮人不道輒敢害之是輕魏以為無
人也諸公受田公思宜如何報之衆皆慟哭深州刺
史牛元翼成德良將也愬使以寶劍玉帶遺之曰昔
吾先人以此劍立大勲吾又以之平蔡州今以授公
努力翦度湊元翼以劍帶洵于軍報曰願盡死會愬
疾作不果出兵乃起復用布為魏博節度使布固辭
不獲與妻子賓客訣曰吾不還矣悉屏旌節導從而
行未至魏州三十里被髮徒跣號哭而入居于聖室
月俸千緡一無所取賣舊產得錢十集覽鎮人謂鎮
餘萬緡以頒士卒舊將老者兄事之州之人聖
室聖鳥各反又鳥故反爾雅曰牆謂之聖注自飾牆
也記閒傳曰齊衰之喪居聖室又雜記曰士居聖室

注聖室景士璽質實魏鎮二州名魏注見漢成帝綏
為之不塗璽也

武九年常山王庭湊武俊義子節鉞注見德宗興元
元年魏博節度注見漢成帝綏和二年魏郡成德軍

名注見漢光武建武九年常山牛元翼趙
州人蔡州注見漢光武建武十九年汝南

書法

綱目書起復八皆識也惟田布
無識焉詳太宗貞觀十五年

瀛州軍亂執觀察使盧士玫○詔諸道討王庭湊以牛

元翼為深北翼節度使庭湊圍深州質實深冀二州名深
注見長慶二年

下博冀注見泰
二世二年信都○九月相州軍亂殺刺史邢蕤質實相
州

注見漢元帝建
昭二年魏郡

發明

自盧龍軍亂至是不三月間而成德之亂瀛州之亂迭書于策則當時君相經濟大業從

可知矣夫以穆宗之荒縱崔植杜元穎輩之庸鄙苟無他變則是天下果易治也有志當世者可不

鑒諸

○吐蕃遣使來盟以劉元鼎為吐蕃會盟使

命宰相與吐蕃使者論訥羅盟于城西遣元鼎入吐蕃亦與其宰相以下盟

集覽

論訥羅使

者名也論注見中宗嗣聖十七年諸論

書法

來盟何敵辭也蠻夷會盟其辭四請盟卑辭也受盟順辭也與盟降辭也來盟抗辭也網

目書外盟五詳高祖武德七年皆唐也莫危於渾瑊莫辱於元鼎者矣

朱克融掠易州質實

易州注見周世宗顯德六年

○詔兩稅皆輸布

絲纊

自定兩稅法以來錢日重物日輕民所輸三倍其初戶部尚書楊於陵言錢者所以權百貨貿遷有無所宜流散不應蓄聚今稅百姓錢藏之公府又開元中天下鑄錢七十餘爐歲入百萬今纔十餘爐歲八十五萬又積於富室流入四夷如此則錢焉得不重物焉得不輕今宜使天下輸稅課者皆用穀帛廣鑄錢而禁滯積及出塞者則錢日滋矣從之

冬十月以王播同平章事

播為相專以承迎為事未嘗言國家安危

以裴度為鎮州行營都招討使○以王智興為武寧節

度副使

先是副使皆以文吏為之上聞智興質實武寧節度

有勇畧欲用之於河北故以是寵之注見秦始

皇二十八年彭城河北道名

注見漢成帝綏和二年魏郡

以魏弘簡為弓箭庫使元稹為工部侍郎

翰林學士元稹與知樞密魏弘簡深相結求為宰相
由是有寵稹無怨於裴度但以度先達重望恐其復
有功大用妨已退取故度所奏軍事多與弘簡從中
沮之度上表曰逆豎搆亂震驚山東姦臣作朋撓敗
軍政陛下欲掃蕩幽鎮先宜肅清朝廷河朔逆賊祗
亂山東禁閑姦臣必亂天下是則河朔患小禁閑患

大小者臣與諸將必能翦滅大者非陛下覺悟制斷無以驅除臣蒙陛下委付之意不輕遭姦臣抑損之事不少但欲令臣失所而於天下理亂山東勝負悉不之顧若朝中姦臣盡去則河朔逆賊不討自平若姦臣尚存則逆賊縱平無益表三上上雖不悅以度大臣不得已罷弘簡樞密解鎮翰林而思遇如故范氏曰昔周宣王使文武之臣征伐於外而左右前後得孝友正良之士以善君心是以讒言不至而忠謀見用此所以能成功也穆宗庸昏姦諂在側裴度欲先正其本而後治其末先圖其大而後憂其小此輔相之職業也而其君多僻卒無成功蓋自古命將出師而小人沮之於內未有能克勝者也可不為深戒哉

集覽

禁闌開劉昌宗音暉爾雅曰宮中門謂之闌注謂相通小門也廣雅曰闌謂之闌禁闌注

見漢武帝質實

東宮注見宋文帝元嘉二十五年

書法

於是裴度言之則黜也曷為書以病穆宗也

而以此職處之書以所以見穆宗之思遇如故也是故吐突承璀坐事為淮南監軍則不書黜書以憲宗元和六年魏弘簡有罪為弓箭庫使則不書黜書以是年皆病其上也夷榘於弘簡奈何榘結弘簡以求相位綱目比而書之所以絕之於士君子之林也垂戒嚴矣

發明

元榘失節於宦者君子恥之然特未見其跡也至是上書魏弘簡為庫使下書榘為侍郎

則其附會權倖之實始不可掩其為小人明矣惜哉

宿州刺史李直臣伏誅

直臣坐賊當死宦官受其賂為之請御史中丞牛僧孺固請誅之上曰直臣有才可惜僧孺對曰彼不才

者安足慮本設法令所以擒制有才之人安祿
山朱泚皆才過於人法不能制者也上從之
質實

一統志云宿州本古之宿國春秋時屬宋後并於楚
秦屬泗水郡漢屬沛郡晉因之梁置睢州北齊置睢
南郡唐置宿州宋置保靜軍治符離縣元仍
為宿州屬歸德府國朝因之改屬鳳陽府

十二月深州行營節度使杜叔良討王庭湊大敗詔以
李光顏代之

初橫海節度使烏重胤將全軍救深州獨當幽鎮東
南重胤宿將知賊未可破按兵觀釁上怒徙重胤山
南西道而叔良素事權倖宦官薦之詔以代重胤至
是將諸道兵與鎮人戰大敗詔復以李光顏代之

質實

山南西道注見周
赧王四年漢中

以朱克融為平盧節度使

自憲宗征伐四方國用已虛及上即位賞賜無節而幽鎮用兵久無功府藏空竭執政以王庭湊殺田弘正而克融因張弘靖罪有重輕

質實

平盧節度注見漢桓帝永康元

年青州幽鎮二州名已注見前蓋言朱克融及王庭湊也

寅壬
二年春正月盧龍兵陷弓高

先時弓高守備甚嚴有中使夜至守將不內旦乃得入中使大詬怒賊謀知之他日偽遣人為中使夜至守將遽內之賊眾隨入又圍下博中書舍人白居易上言曰自幽鎮逆命朝廷徵兵十七八萬四面攻圍已逾半年王師無功賊勢猶盛弓高既陷糧道不通下博深州饑窮日急蓋由節將太眾其心不齊未立

功者或已拜官已敗衄者不聞得罪既無懲勸以至遷延請令李光顏將諸道勁兵約三四萬人從東速進開弓高擡路合下博諸軍解深邢重圍與元翼合勢令裴度將太原全軍兼招討舊職四面壓境觀釁而動若乘虛得便即令同力剪除若戰勝賊窮亦許受降納款如此則夾攻以分其力招諭以動其心必未及誅夷自生變故仍詔光顏選留諸道精兵餘悉遣歸本道蓋兵多而不精豈惟虛費資糧兼恐撓敗軍陳故也諸道監軍請皆停罷衆齊令一必有成功又朝廷本用田布令報父讐今全師出界數月不進蓋由此軍累經優賞兵驕將富莫肯為用況其月費計錢二十八萬緡若更遷延將何供給此尤宜早令退軍者也苟兵數不抽軍費不減食既不足衆何以安不安之中何事不有況有司迫於供軍百端斂率不許即用度交關許即人心無憐自古集覽盧龍藩安危皆繫於此惟陛下念之疏奏不省

集覽

盧龍藩鎮名也

有州九曰幽涿營瀛莫平薊蓟檀弓高注見德宗貞元五年下博今深州靜安縣下博鎮是無慘慘音聊又音留並正誤有司百端斂率許即人心無慘今按悲恨也若許有司斂率豈得人心反無悲恨

此慘字當與聊同聊亦作慘言質實盧龍道名注見百端斂率則民心無所聊賴也質實漢武帝元朔二

年肥如一統志云下博漢之縣名屬信都國東漢屬安平國晉因之隋屬信都郡尋置深州治安平縣後廢唐復置深州於饒陽五代周始徙治下博宋改下博為靜安縣金元俱仍舊國朝初以靜安省入州改屬真定府中使注見玄宗開元十五年太原府名注見齊明帝建武三年并邢州名注見楚義帝元年襄國

成德兵掠官軍糧運

度支饋滄州糧車六百乘皆為成德所掠時諸軍匱乏衣糧在途皆邀奪之其懸軍深入者皆凍餒無所得

集覽

匱乏衣糧匱乏句斷衣糧屬

質實

成德軍名注見憲宗

元和十五年滄州注見晉穆帝永和六年

魏博將史憲誠殺其節度使田布詔以憲誠為節度使

初田布從弘正在魏善視牙將史憲誠及為節度使遂寄以腹心軍中精銳悉以委之至是布以魏兵討鎮軍于南宮以饋運不繼發六軍租賦以供軍將士不悅憲誠因鼓扇之會有詔分魏博軍與李光顏使救深州布軍遂潰多歸憲誠布獨與中軍八千人還魏復召諸將議出兵諸將益偃蹇曰尚書能行河朔舊事則死生以之若使復戰則不能也布歎曰功不成矣即日作遺表曰臣觀衆意終負國恩臣既無功

敢忘即死伏願陛下速救光顏元翼不則義士忠臣
皆為河朔屠害矣奉表號哭拜授幕僚李石乃入啓
父靈抽刀而言曰上以謝君父下以示三軍遂刺心
而死憲誠聞之遂喻衆以河朔舊事衆擁憲誠為留
後詔以為節度使憲誠雖外奉朝廷然內實與幽鎮
連結范氏曰憲宗平河南開魏博由宰相得其人也
穆宗拱手而得幽鎮不惟不能有而并魏博失之
由宰相非其才也相者治亂之所繫豈不重歟

隸

覽

南官注見漢帝玄更始二年
河朔舊事注見前年以故事勸

質實

六軍注見玄宗
天寶十五載

書法

布自殺且蔽罪於憲誠何憲誠為布腹心而
鼓扇將士致布於自殺不書殺則姦賊得以

逞其罪矣前書以朱克融為盧龍節度使此書以
史憲誠為魏博節度使下書以王庭湊為成德節

度使而河北
復盡決矣

發明

田布之死本以軍潰歸魏繼以諸將不肯用命遂至自殺然綱目歸罪史憲誠者憲誠受

委腹心反乃鼓扇衆軍卒置田布於死地是豈非憲誠殺之哉禍亂相尋他日憲誠復死於亂軍天

道要自
不遠云

二月以王庭湊為成德節度使遣兵部侍郎韓愈宣慰

其軍

庭湊圍牛元翼於深州官軍三而救之皆以乏糧不能進雖李光顏亦閉壁自守朝廷不得已以庭湊為成德節度使而遣韓愈宣慰其軍上之初即位也兩河畧定蕭俛段文昌以為天下已平漸消兵請密詔軍鎮每歲百人之中限八人逃死上方荒宴不以國事為意遂可其奏軍士落籍者皆聚山澤為盜及

幽鎮作亂一呼而亡卒皆集詔徵諸道兵討之皆臨
時召募烏合之衆以行又諸節度既有監軍主將不
得專號令戰小勝則飛騎奏捷自以為功不勝則迫
脇主將以罪歸之悉擇軍中驍勇以自衛遣羸懦者
就戰故每戰多敗又凡用兵舉動皆自禁中授以方
畧朝令夕改不知所從不度可否惟督令速戰中使
道路如織故雖以諸道十五萬之衆裴度元臣宿望
烏重胤李光顏皆當時名將討幽鎮萬餘之衆屯守
踰年竟無成功財竭力盡崔植杜元穎王播為相皆
庸才無遠畧史憲誠既逼殺田布朝廷不能討遂并
朱克融王庭湊以節鉞授之由是再失河朔迄于唐
亡不能復取克融既得旌節乃出張弘靖等而庭湊
不解深州之圍詔愈至境更觀事勢勿遽入愈曰止
君之仁死臣之義遂往至鎮庭湊拔刃弦弓以逆之
及館甲士羅於庭庭湊言曰所以紛紛者乃此曹所
為非庭湊心愈厲聲曰天子以尚書有將帥材故賜

之節鉞不知尚書乃不能與健兒語邪甲士前曰先
太師為國擊走朱滔血衣猶在此軍何負朝廷乃以
為賊乎愈曰汝曹尚能記先太師則善矣夫逆順之
為禍福豈遠邪自祿山思明以來至元濟師道其子
孫有今尚存者乎田令公以魏博歸朝廷子孫孩提
皆為美官王承元以此軍歸朝廷弱冠建節劉悟李
祐皆為節度使汝曹亦聞之乎庭湊恐衆心動麾之
使出謂愈曰侍郎來欲何為愈曰神策諸將如牛元
翼者不少但朝廷顧大體不可棄之耳尚書何為圍
之不置庭湊曰即當出之因與愈宴禮而歸之未幾
元翼將十騎**集覽**出張弘靖去年弘靖被
突圍出深州**質實**禁中
宋考武大
明六年

發明

朱克融首亂河朔王庭湊史憲誠繼之朝廷
皆不能討因授節鉞田弘正父子盡忠守正

皆死于賊綱目比書于冊則唐室紀綱為可知矣
韓愈宣慰之行殆與顏真卿無異而偶得免死者
亦幸焉耳觀其詰責庭湊之詞簡嚴切直至今凜
凜猶有生氣寧自預知不死其忠梗大節如此而
世或以文士視之則非矣茲故因而及之

以傳良弼為沂州刺史李寰為沂州刺史

樂壽兵馬使傅良弼博野鎮遏使李寰所戍在幽鎮
之間朱克融王庭湊互加誘脇二人不從各以其眾
堅壁賊竟不質實

沂州注見晉孝武太元九年新興樂壽縣名注見隋恭帝義寧二年

一統志云博野古地名漢為涿郡蠡吾縣地東漢末
分置博陵縣屬中山國晉屬高陽國後魏改為博野
縣齊以蠡吾省入隋屬高陽郡唐初屬蒲州後改屬
不一五代周屬定州宋屬寧邊軍元初省尋復置國

朝初屬祈州後
改屬保定府

崔植罷以元稹同平章事○以裴度為司空東都留守

元稹怨裴度欲解其兵柄故勸上雪王庭湊而罷兵
以度為司空平章事東都留守諫官爭上言時未偃
兵度有將相全才不宜置
質實司空官名注見陳宣
帝太建九年六卿東

都注見秦莊襄
王元年三川

以李聽為河東節度使

初聽為羽林將軍有良馬上為太子遺左右諷求之
聽以職總親軍不敢獻及河東缺帥上曰李聽不與
朕馬是必可
質實河東節度注見周赧王十二年蒲
坂李聽京兆萬年人羽林將軍注

任遂用之

見隋恭帝
皇泰二年

書法

穆宗即位以來政無可紀獨有誅李直臣用李聽免欠錢復韓愈四事耳瑕不掩瑜故網

目悲
書之

昭義節度使劉悟執監軍劉承偕

承偕恃恩陵轢悟數衆辱之陰與磁州刺史張汶謀縛悟送闕下悟知之諷其軍士殺汶圍承偕欲殺之幕僚賈直言責悟曰公欲為李司空邪安知軍中無如公者悟遂謝直言免承偕而囚之上詔悟送承偕悟不奉詔會裴度入朝上問度宜如何處置度對曰承偕驕縱不法臣盡知之陛下必欲收天下心止應下半紙詔書具陳其罪令悟集將士斬之則藩鎮之臣孰不思為陛下效死非獨悟也上曰朕不惜承偕

然太后以為養子卿更思其次度奏請
集覽 李司空謂李師

道為劉質實昭義節度注見周報
悟所斬質實王五十三年上黨

三月詔內外諸軍將士有功者奏與除官

初上在東宮開天下厭吾憲宗用兵故即位務優假
將卒以求姑息詔神策六軍及南牙常參武官悉加
獎擢諸道大將从次及有功者悉奏聞除官於是商
賈胥吏爭賂藩鎮牒補列將而薦之即升朝籍士大
夫皆扼腕**集覽** 南牙常參武官牙與衙通唐書兵志曰
腕歟息**集覽** 南衙者諸衛兵是也常參官注見代宗
大歷**質實** 扼腕注見漢武
元年帝元鼎四年

書法 有功求賞常情也無不奏者矣又詔啓
之有不妄濫者乎書曰詔病其上也

武寧副使王智興作亂詔以為節度使

詔遣智興以精兵三千討幽鎮崔羣忌之奏請以為他官未報會有詔罷兵智興引兵先入其境羣懼遣使迎勞且使釋甲而入智興不從引兵入府逐羣遣兵送至壩橋遂掠鹽鐵院錢帛及諸道進奉而返朝廷以新罷兵力未能討以智興為節度使

集覽

壩橋壩一作甬注見德宗建中二年

實實

武寧

軍名注見秦始皇二十八年彭城

書法

直書其事唐之不振益可見矣然則崔羣被逐曷為不書全羣也曷為全之為賢者諱網

目之厚也是故崔羣不書逐是年鄭畋不書逐僖宗中和元年

詔留裴度輔政

欽定四庫全書

御批資治通鑑綱目
卷四十九上

言事者皆謂裴度不宜出外
上亦自重之制留度輔政

王播罷○夏四月朔日食質實

日食注見新
恭天風元年

○詔免江

州逃戶欠錢

戶部侍郎判度支張平叔言官自糶鹽可獲倍利又
請令所由將鹽就村糶易又乞令宰相領鹽鐵使以
糶鹽多少為刺史縣令殿最檢責所在實戶據口給
一年鹽使其四季輸價富商大賈有邀截喧訴者所
在杖殺詔百官議兵部侍郎韓愈曰城郭之外少有
見錢糶鹽多用雜物貿易鹽商則無物不取或賒貸
徐還用此取濟兩得利便今令人吏坐鋪自糶非得
見錢必不敢受如此貧者無從得鹽自然坐失常課
如何更有倍利若令人吏將鹽家至戶到而糶之必
索百姓供應騷擾極多又刺史縣令職在分憂豈可

惟以鹽利多少為之陞黜不復考其理行又貧家食鹽至少或有旬月淡食若據口給鹽依時徵價官吏畏罪必用威刑臣恐因此所在不安此尤不可之大者也中書舍人韋處厚曰宰相處論道之地難以釀務實非所宜實參皇甫鎔皆以錢穀為相卒蹈禍敗又欲以重法禁人喧訴夫強人之所不能事必不立禁人之所以犯法必不行事遂寢平叔又奏徵遠年逋欠江州刺史李渤上言度支徵當州貞元二年逃欠戶錢四千餘緡當州今歲旱災田損什九陛下奈何於大旱中徵三十六年前逋負詔悉免之

集

覽

所由猶言所屬也釀務釀才何反說質實殿最注文醴也河內謂之醴禮記鹽曰醴醴見漢宣

帝地節四年江州注見晉明帝太寧二年度支官名注見太宗貞觀十三年當州未詳沿革唯南昌府豐城縣乃唐之富州地或疑即此已注見晉孝武太元六年

書法

書嘉從諫也書免欠始此終綱目書免欠三足年五代丁亥年唐免三司通召五代甲午

年唐蠲

通租

發明

欠錢同宜督也然既曰逃戶則無可追之地特書詔免雖曰幸之蓋亦識之耳

六月裴度罷為右僕射元稹罷為同州刺史

王庭湊之圍牛元翼也和王傳于方言於元稹請遣客間說賊黨使出元翼仍賂兵吏部令史偽出告身二千通令以便宜給賜稹皆然之有李賞者知其謀乃告裴度云方為稹結客刺度度隱而不發賞詣神策告之詔僕射韓臯等鞠按事皆無驗六月度及稹皆罷相諫官言度無罪不當免相稹為邪謀責之太輕上不得已削**質實**同州注見玄宗開元十一年和州名注見漢冲帝永嘉元年歷

長春宮使

陽告身注見玄宗天寶十五載長春宮注見隋煬帝大業十三年

書法

唐世宰相罷書曰罷為某官者皆賢相也度書右僕射宜矣稹也而書同州刺史何譏罰

輕也稹為邪謀其罷也猶刺畿郡以是為太輕故書譏之

發明

大臣以道事君不可則止裴度元勳厚德身任安危然不數月之間既為留守又留輔政

未幾又罷為僕射烏有身為重臣不能少安其跡尚可經綸天下者乎穆宗昏荒其待賢德若此固無足責度於是時自可奉身而退他日優游綠野或者猶以浮沉譏之不亦過乎觀之綱目所書則可見矣噫

以李逢吉同平章事質實

李逢吉贊皇人

○秋七月宣武押

牙李齊作亂討平之

卷四十一上

初張弘靖鎮宣武屢賞以悅軍士李愿性奢侈薄賞勞而峻威刑其妻弟竇瑗典宿直兵瑗驕貪軍中惡之牙將李臣則等作亂斬瑗愿奔鄭州衆推齊為留後監軍以聞詔三省官與宰相議皆以為宜如河北故事授齊節李逢吉曰河北之事蓋非獲已今若并汴州棄之則江淮以南亦非國家有矣杜元穎張平叔爭之曰奈何惜數尺之節不愛一方之死乎議未決會宋亳潁州各奏請命帥上大喜逢吉請徵齊入朝而以韓弘弟充鎮宣武充素寬厚得衆心脫齊旅拒則命徐許兩軍攻其左右而滑軍感其北充必得入矣上皆從之齊不奉詔忠武李光顏兗海曹華皆以兵討齊屢敗其兵韓充入汴境又敗其兵於郭橋初齊以兵馬使李質為腹心及齊不奉詔質屢諫不聽會齊疽發卧家質擒殺之以充未至權知軍務時

牙兵三千人日給酒食力不能支質曰若韓公始至而罷之則人情大去矣不可留此弊以遺吾帥即令罷給而後迎充充既視事人心粗定乃容籍軍中為惡者千餘人一朝悉逐之曰敢少留境內者斬於是軍政大治以李集覽脫亦旅拒脫儻或之辭也亦音質為金吾將軍集覽脫亦旅拒脫儻或之辭也亦音拒質實三省注見宋文帝元嘉三十年鄭州注見梁

命質實

武帝普通六年鄭城汴州注見周顯王二十

九年大梁宋毫穎三州名宋注見漢後主延熙十八年毫注見漢獻帝建安十五年熊邑穎注見梁武帝

天監二年徐許二州名徐注見秦始皇二十八年彭城許注見漢後主建興十年許昌滑軍滑州之軍注

見隋恭帝皇泰二年忠武軍名注見漢後主建興十年許昌兖海曹華四州名兖注見漢獻帝興平二年

海注見秦二世二年鄭曹注見漢光武建武八年濟陰華注見玄宗開元十一年韓公謂韓充金吾官名

注見漢武帝

太初元年

書法

作亂者牙將李臣則也。亦為所推耳。其首亦何容既受其所推。朝命徵之。復不奉詔。是真

亂也不首罪。亦則叛亂之臣。皆得有以藉口矣。

冬十一月太后幸華清宮上畋于驪山考異

上當作帝考證

幸當作如質實

華清宮注見玄宗天寶六載驪山注見秦始皇三十七年

書法

於是上及太后俱幸驪山。首太后何病。太后也。太后信可謂賢矣。而自為侈靡。何以示母

儀於主上哉。綱目上書太后幸下書上畋。正本也。終綱目書太后遊幸三梁。已亥年魏太后遊嵩高

是年五代唐乙酉年蜀太后遊青城書后遊幸二。晉安帝元興三年燕主熙后遊白鹿五代唐甲申

年唐主后幸
張全義第

發明

婦人無故不踰閭閻况在東朝尤宜加謹是時穆宗荒淫務以華侈奉慈極綱目前書太

后居興慶宮固已具載其事于下至是又復出事遊幸唐史載帝自往奉迎留飲數日后於此時儻能少戒其子猶或庶幾何乃推波助瀾反以是為樂邪郭后雖號賢德既已安於華侈之奉由奢入儉有所不堪他時大中之君奉養稍薄遂至鬱鬱不聊乃欲自殞而身罹不測之禍則其所以致是者亦有由矣此綱目於華清之幸驪山之畋所以比書於策以交譏之也嗚呼穆宗母子驕縱如此尚可長享其樂乎

十二月立景王湛為太子考異

太上漏皇字
十上漏國子

上與宦者擊毬於禁中有宦者墜馬上驚得疾不能履地宰相屢乞入見不報裴度三上疏請立太子且請入見言之詔立景王質實景州名注見高湛為皇太子上疾浸瘳

景州名注見高祖武德九年

初行宣明曆

癸卯 三年春三月以牛僧孺同平章事

戶部侍郎牛僧孺素為上所厚初韓弘以財結中外弘薨孫幼主藏奴與吏訟於御史府上憐之取其簿自閱視凡中外主權多納弘貨獨僧孺不納上大嘉遂以僧孺為相時僧孺與李德裕皆有入相之望德裕出為浙西觀察使八年不遷以為集覽主藏奴主李逢吉排已而引僧孺由是怨愈深掌府藏之奴款也物貨所蓄質實御史官名注見漢成帝何平謂之藏藏才浪反質實二年浙西觀察使注見憲宗

元和二年杭州不遷
注見漢成帝綏和二年

夏四月以鄭權為嶺南節度使

翼城人鄭注巧譎傾諂善揣人意以醫遊四方李愬
食其藥頗驗署為牙推浸預軍政妄作威福軍府患
之監軍王守澄請去之愬曰注奇才也將軍試與之
語苟無可取去之未晚乃使注見守澄守澄不得已
見之坐語未久大喜促膝恨相見之晚守澄入知樞
密挈注以西薦於上上亦厚遇之自上疾守澄專
制國事勢傾中外注日夜出入其家與之謀議人莫
能窺其迹始則微賤巧宦之士或因以進數年之後
達官車馬滿其門矣工部尚書鄭權家多姬妾祿
薄不能贍因注通於守澄以求節鎮遂得嶺南

集

覽

牙推官名也牙與衙通推川推反促膝言膝相近也
杜甫相從歌夜如何其初促膝注促膝密語也挈注

以西揭挈鄭注與之俱西入朝

達官注見隋煬帝大業元年

質實嶺南節度注見秦始皇三十三年南海翼城縣名注見

隋恭帝皇泰二年滑州

五月以柳公綽為山南東道節度使

公綽過鄧縣有二吏一犯賊一舞文衆謂公綽必殺犯賊者公綽判曰賊吏犯法法在姦吏亂法法亡竟

誅舞集覽

舞文舞弄文法也

質實

山南東道節度注見漢獻帝建安十二年襄陽鄧縣

注見周赧王三十六年鄧

六月以韓愈為京兆尹

愈為京兆六軍不敢犯法私相質實京兆郡名注見謂曰是尚欲燒佛骨何可犯也

質實京兆郡名注見

年六軍注同上
天寶十五載

秋八月幸興慶宮考異

幸上湯帝字質實興慶宮注見玄宗開元二年

幸興慶宮至通化門樓投絹二百匹
施山僧上之濫賜皆此類不可悉紀

書法

幸者何乘興所至必有恩賞人以為幸也內
官未有書幸者此其書幸何於是上至通化

門投絹施僧多至二百匹故雖太
后居之不書朝書幸濫賜也

以裴度為司空山南西道節度使質實

山南西道節度注見周報王四

年漢中司空官名注見
陳宣帝太建九年六卿

李逢吉惡度出之
山南不兼平章事

欽定四庫全書

御批資治通鑑綱目
卷四十九上

九月復以韓愈為吏部侍郎李紳為戶部侍郎

李逢吉結王守澄勢傾朝野惟翰林學士李紳常排
抑之逢吉患之而上遇紳厚不能遠也會御史中丞

缺逢吉薦紳清直宜居風憲之地以上以中丞亦次對
官可之會紳與京兆尹韓愈爭臺參文移往來辭語

不遜逢吉奏二人不協以愈為兵部侍郎紳為江
西觀察使愈紳入謝上問其故乃悟故有是命

實江西觀察使注見梁
孝元帝承聖二年

甲辰四年春正月帝崩太子即位考證

當作太子甚即位

上餌金石之藥處士張臯上疏曰神慮澹則血氣和
嗜慾勝則疾疹作藥以攻疾無疾不可餌也昔孫思

邈有言藥勢有所偏助令人藏氣不平借使有疾用
藥猶須重慎況無疾乎庶人尚爾況天子乎先帝信

方士妄言餌藥致疾此陛下所詳知也豈得復循其
覆轍乎上善其言而求之不己既而疾作命太子監

國宦官欲請郭太后臨朝太后曰昔武后稱制幾傾
社稷我家世守忠義非武氏比也太子雖少但得賢

宰相輔之卿輩勿預朝政何患國家不安自古豈有
女子為天下主而能致唐虞之理乎取制書手裂之

太后兄太常卿劉亦密上牋曰若果徇其請臣請先
帥諸子納官爵歸田里太后泣曰祖考之慶鍾於吾

兄是夕上崩敬宗即位初穆宗之立神策軍士人賜
錢五十千至是宰相議以太厚難繼乃下詔曰宿衛

之勤誠宜厚賞屬頻年早歉御府空虛邊兵尚未給
衣需卹期於均濟人但賜絹十匹錢十千仍出內庫

綾二百萬匹付度支充質實處士注見周報王元年
邊軍春衣時人善之

推步醫藥居太白山隋文帝以國子博士召不拜唐
太宗召至京師時年已老欲官之不受竟稱疾還山

欽定四庫全書

御批資治通鑑綱目
卷四十九上

二月貶李紳為端州司馬

初穆宗既留李紳李逢吉愈忌之紳族子虞自言不
樂仕進而以書與從父者使薦己紳聞而謂之虞深

怨之悉以紳平日密論逢吉之語告之逢吉益怒使
虞與從子仲言及補闕張又新伺求紳短敬宗即位

逢吉令王守澄言於上曰陛下之所以為儲貳逢吉
力也如杜元穎李紳輩皆欲立深王上時年十六疑

未信會逢吉亦言紳謀不利於上請加貶謫乃貶之
逢吉帥百官表賀百官復詣中書賀逢吉方與又新

語門者不內良久又新出旅揖百官曰端溪之事又
新不敢多讓眾駭愕右拾遺吳思獨不賀逢吉怒遣

使吐蕃又新等猶忌紳日上書言貶紳太輕上許為
殺之朝臣莫敢言獨翰林侍讀學士韋處厚上疏指

述紳為逢吉之黨所讒上稍開悟會閱禁中文書有
穆宗所封一篋發之得裴度杜元穎及紳請立上為

太子疏乃焚諧紳書後有言者不復聽矣胡氏曰敬宗既得裴度李紳之疏則逢吉守澄誣罔明白于是罷逢吉而相紳置守澄於法豈不偉哉然使紳誠有動搖之罪穆宗發覺治之可也敬宗既為天子矣又何治焉今以逢吉讒紳謀不利於己則欲殺之得紳立已疏則嗟嘆之是其喜怒皆私已而發不以公道行之此所以來

集覽

旅揖禮夏官司士孤卿特揖大

揖門左揖門右注三孤六卿職尊故逐一揖之旅衆也大夫稍卑有中下二等故各於等而衆揖之士又卑而有上中下故旁三揖焉還回旋也以在路門左右者皆南面故還揖之端溪之事又新不敢多讓賤李紳於端州之事張又質實端州注見梁武帝太清新自言我亦與其謀二年高要深州名注見長慶二年下博禁中注見宋孝武帝大明六年端溪縣名注見高祖武德九年康州

欽定四庫全書

御批歷代通鑑輯覽
卷四十九上

尊皇太后為太皇太后上母王妃為皇太后考異

上字美按

漢永建二年書追尊母李氏則當但書母王妃

○幸中和殿擊毬考異

幸上漏帝宇

質實

中和殿未詳處所

自是數遊宴擊毬奏樂賞賜宦官樂人不可悉紀賜宦官服色有今日賜綠而明日賜緋者

書法

擊毬不書據文宗擊毬得疾不書此何以書

試僅兩四期穆宗之喪甫及易月於此擊毬忘哀甚矣故書中和殿內殿未有書幸者此其書幸何

於是賞賜宦官樂人不可勝紀故特書幸譏之蓋至此而穆宗貽謀之效著矣

發明

禹有典則以貽子孫武貽孫謀以燕翼子前人之所作為後人之所則倣也穆宗嗣位春

秋二十有六忘哀作樂荒淫不道其子則而象之甫及易月遽即宴遊曾無戚容卒之父子短祚唐緒益微此正無逸所謂立王生則逸生則逸亦罔克壽或四三年者也綱目方書即位繼書幸中和殿擊毬其視穆宗荒縱殆又甚之二載而殞非不幸也

三月赦

詔諸道常貢之外無得進奉

以劉栖楚為起居舍人不拜

上視朝晏百官班於紫宸門外老病者幾至僵踣諫議大夫李渤白宰相曰昨日疏論坐晚今晨愈甚請出閣待罪於金吾仗既坐班退左拾遺劉栖楚獨留進言曰陛下富於春秋嗣位之初當宵衣求理而嗜

寢樂色日晏方起梓宮正殯鼓吹日喧令聞未彰惡
聲遐布臣恐福祚之不长請碎首玉階以謝諫職之
曠遂以額叩龍墀見血不已響聞閣外李逢吉宣曰
劉栖楚休叩頭俟進止栖楚捧首而起更論宦官事
上連揮令出栖楚曰不用臣言請繼以死牛僧孺宣
曰所奏知門外俟進止栖楚乃出待罪金吾仗於是
宰相贊成其言上命中使就仗并李勣宣慰集覽金
令歸尋擢栖楚為起居舍人栖楚辭疾不拜
仗馬文昌雜錄方唐盛時立仗於宣政殿天子坐紫
宸而金吾殿中細仗自東西閣門入謂之喚仗執金
吾注見漢武帝太初元年及漢光武建武十二年又
仗注見高宗永徽五年宵衣天子憂勤當未明時求
衣質實梓宮注見漢安帝延光四年
鼓吹注見晉武帝太康三年

書法

書不拜何美栖楚也若栖楚可謂敢言矣終
綱目拜官書不受十九書讓還一書不拜三

詳漢安帝
永初元年

發明

栖楚本逢吉之黨內有所挾故敢訐直然所謂惡聲遐布恐福祚之不長則亦可謂切中實歷之膏肓者矣君子不以人廢言故亦書不拜起居之官以予之

夏四月以李虞為拾遺

李逢吉用事所親厚者張又新李仲言李虞劉栖楚等八人又有從而附麗之者時人目之為八關十六

子集覽

附麗注見德宗興元元年八關十六子按李逢吉傳鄭注得幸於王守澄逢吉遣從子訓

賂注結守澄為與援自是肆志無所憚其黨有張又新李續張權輿劉栖楚李虞程昔範姜治及訓八人而傳會者又八人皆任要劇故號八關十六子有所求請先賂關子後達逢吉無不得所欲也

書法

書譏也何譏焉八關之一也終綱目書以
為拾遺六詳憲宗元和元年惟李虞為譏

辭

盜入清思殿中尉馬存亮遣兵討平之

卜者蘇玄明與染坊供人張韶善謂之曰我為子卜
當升殿坐與我共食今主上晝夜毬獵多不在宮大
事可圖也韶以為然乃與玄明謀結染工無賴者百
餘人匿兵於紫草車載以入有疑其重而詰之者韶
急殺之斬關而入先是右軍中尉梁守謙有寵每兩
軍角伎上常佑右軍至是上狼狽欲幸右軍以遠不
能遂幸左軍左軍中尉馬存亮走出迎自負上入軍
遣大將康藝全將騎卒入宮討賊上憂二太后隔絕
存亮復以騎迎至軍韶升清虛殿坐御榻與玄明同
食曰果如子言玄明驚曰事止此邪韶懼而走藝全

兵至擊殺之餘黨悉獲上乃還宮盜所歷諸門監門宦者法當死詔並杖之使仍舊職存亮不自矜委權求出監

集覽

清思殿一本思誤作虛

質實

狼狽注見漢獻帝初平三年中尉官名注

見憲宗元和十五年淮南軍注見漢武帝元朔五年

發明

敬宗不道妖氣乘之書盜入清思殿所以示警戒之意而亦不知悟也其及宜矣

五月以李程竇易直同平章事

上好治宮室欲營別殿制度甚廣李程諫請以所具木石回奉山陵上即從之既而波斯獻沉香亭子材拾遺李漢言此何異瑤臺

集覽

波斯西域國名古條支國也在吐利城在

怛密國西按唐史波斯居達

質實

李程京兆人竇易直始平人

六月加裴度同平章事

初牛元翼鎮襄陽數賂王庭湊以請其家庭湊不與聞元翼薨盡殺之上聞之嘆宰相非才使凶賊縱暴翰林學士韋處厚言裴度勲高中夏聲播外夷若置之巖廊委其參決河北山東必稟廟算理亂之本非有他術順人則理違人則亂伏承陛下當食嘆息恨無蕭曹今有一裴度尚不能留此馮唐所以謂漢文得廉頗李牧不能用也夫御宰相當委之信之親之禮之於事不效於國無勞則置之黜之如此則在位者不敢不厲將進者不敢苟求臣與逢吉素無私嫌嘗為裴度無辜貶官今之所陳上答聖明下達羣議耳上見度奏狀無同平章事以問處厚處厚具言逢吉排沮之狀李程亦勸上加禮於度上乃加度同平章事

章質實

襄陽府名注見漢獻帝建安十二年蕭曹謂漢丞相蕭何曹參陛下注見漢光武建武二

十七年馮唐所以謂漢文得廉頗
李牧不能用事在漢文帝十四年

夏綏節度使李祐進馬百五十匹却之

侍御史溫造彈祐違敕進奉請論如法詔釋之祐謂
人曰吾夜半入蔡州城取吳元濟未嘗心動今日膽
落於溫質實夏綏二州名夏注見漢武帝元朔元年
御史矣朔方綏注見周顯王三十五年雕陰溫
造祁縣人大
雅五世孫

冬十月賜韋處厚綿綵銀器

翰林學士韋處厚諫上宴遊曰先帝以酒色致疾損
壽臣時不死諫者以陛下年已十五故也今皇子纔
一歲臣安敢畏死而不諫乎上感其言故有是賜胡
氏曰韋德載忠賢人也而其言未免有失夫人君耽

弱酒色而其臣不諫曰君有子長矣始聽其沈湎可
也是安得為忠乎蓋亦曰先帝以酒色之故天年不
遐臣不能諫罪當萬死況今陛下富於春秋血氣未
定萬一致疾隳宗社付託貽皇太后之憂則臣雖萬
死亦不足以塞責矣如是質實始二年德載韋處厚
而言其或足以動聽矣乎

表
字

發明

不用其言而厚其賜要當辭而不受可也書
賜韋處厚錦絲銀器是貨之也焉有君子而

可以貨取乎蓋
亦交譏之耳

十一月葬光陵質實

一統志云光陵在西安府蒲城縣北二十里堯山內

〇十二

月以劉栖楚為諫議大夫

淮南節度使王播以錢十萬緡賂王守澄求領鹽鐵
諫議大夫獨孤朗等數人請開延英論之上問前廷
爭者不在中邪即日除栖楚諫議集覽前廷爭者謂
大夫而竟以播兼鹽鐵轉運使劉栖楚也先
嘗以額叩龍質實淮南節度注見漢武帝元朔五年
墀而極諫淮南國獨孤朗洛陽人及之子延
英殿名注見德
宗貞元三年

罷泗州戒壇

徐泗觀察使王智興以上生日請於泗州置戒壇度
僧尼以資福許之自元和以來敕禁此弊智興欲聚
貨首請置之於是四方輻輳智興由此貲累鉅萬浙
西觀察使李德裕上言若不鈐削至降誕日方停計
兩浙福建皆失六十質實徐泗二州名徐注見泰始
萬丁奏至即日罷之質實皇二十八年彭城泗注見

昭宗景福二年輜轅注見漢文帝六年一統志云兩
浙古揚州之地漢會稽郡兼統兩浙隸揚州部刺史
唐貞觀中隸江南道開元中增置江南東道採訪處
置使而兩浙諸州並隸焉宋初以兩浙為一路後分
浙東西為兩路而浙西安撫使治臨安浙東安撫使
治紹興並以守臣兼領元置江浙等處行中書省及
江南浙西道肅政廉訪司于杭州又置浙東海右道
肅政廉訪司于婺州又置浙東道宣慰司于慶元國
朝置浙江等處承宣布政使司領杭州嘉興湖州嚴
州金華衢州處州紹興寧波台州温州十一府云浙
西觀察使注同上文
道名注見德宗貞元七年

書法

書美從諫也書戒壇始此終綱目
書戒壇二是年懿宗咸通二年

回鶻崇德可汗死考異

提要元
誤作卒

御批資治通鑑綱目卷四十九上